

四庫全書

集部

欽定四庫全書

集部

西山文集卷三十一

詳校官庶吉士張溥

主事臣呂雲棟覆勘

總校官降調編修臣倉聖脉

校對官主事臣陳墉

謄錄監生臣朱垵

欽定四庫全書

西山文集卷二十一

宋 真德秀 撰

翰林詞草

答詔

賜光祿大夫右丞相兼樞密使兼太子少師史
彌遠乞解政機俾還田里不允詔

勅具悉朕惟古之大臣有身繫安危而不容以家國異視

者曰世臣曰社稷臣若商之伊陟巫賢周之呂伋召虎世臣也漢之平勃唐之狄仁傑社稷臣也有一于斯去就之間俱不可苟而况兼之者乎卿繼世以秉鈞衡捐身以安宗廟勲烈茂盛簡于朕心可緣似續之私遽起燕閒之念惟今百度隳弛賴卿而浸修四方搶攘賴卿而畧定倘半途而遂畫俾一簣之終虧既非朕圖任責成之本心亦豈卿忘家徇國之初志勉思此義勿復有云所請宜不允

賜光祿大夫右丞相兼樞密使兼太子少師史

彌遠辭免男寬之致仕轉官除職等指揮不

允詔

勅具悉夫元首股肱古人謂之一體戚休所在上下同
之卿既惟吾社稷之憂朕豈忘爾家庭之卹日聞冢嗣
遽天天年當食喟然幾失七箸念非假哀榮之典不足
慰慈愛之心眦秩星卽進班奎閣寵徒加於身後恩靡
逮於生前朕猶憮然卿奚復遜所請宜不允

賜太中大夫權戶部尚書詳定勅令官沈作賓

乞宮觀不允詔

勅具悉朕聞士君子以適用為材而不以空言為貴以
濟時為急而不以輕去為高如卿貴析守符著循良豈
弟之績薦司邦計知斂散取予之權恢牛刃而有餘試
蟻封而無窘亦足以觀適用之材矣文昌八座地望兼
崇職在近臣當思許國顧方厭承明之直羨真館之安
是豈急於濟時之誼乎先正名臣繇賞延而植勲業者
多矣而卿以此自憚非所聞也勉圖而功答我殊遇所

請宜不允

賜光祿大夫右丞相兼樞密使兼太子少師史
彌遠再上奏劄子乞歸田里不允不得再有

陳請詔

勅具悉朕聞公與私不兩立恩與義不並行體國如家
則顧家之念可忘視民如子則愛子之情可奪惟卿大
節朕所深知方其力陳社稷之謀固已盡指宗族之計
豈容今日或異初心况聞幹蠱之有人自可殫誠而共

政遽求閒退朕何望焉所請宜不允不得再有陳請

賜顯謨閣直學士通奉大夫提舉隆興府玉隆

萬壽宮謝源明乞守本官職致仕不允詔

勅具悉朕惟國家眷獎舊臣有年至而不得謝者豈獨以爵齒為貴哉蓋其周旋當世之故練習朝廷之儀一旦欲有閒焉則安車束帛猶足以徠之此朕於近臣之告老未嘗輒可其奏者蓋以是也卿膚敏之材通明之畧出藩入從蔚有壯猷年齡雖高精力尚富雍容祠館

足以自娛豈必挂冠然後為樂勉承眷倚母重有言所
請宜不允

賜太中大夫顯謨閣待制新知泉州陳岷辭免
除兵部侍郎兼直學士院恩命不允詔

勅具悉朕登進老成以重朝廷之體尊獎廉靖以厚薦
紳之風卿強識博聞淹貫千載英詞麗藻焜耀一時退
然靡銜于智能卓爾獨安於義命當權門之翕赫甘文
館之委蛇衆翼怒飛儀鳳之翔何遠萬流奔注砥柱之

立不移雖暫陪獻納之班旋復困排根而去粵余更化
命爾殿藩遏寇虐於江湖之衝奄仁聲於嶺嶠之表厥
有嘉績簡于朕知與其薦佩虎符以責拊摩之效孰若
延登釐禁以究潤色之長擢貳五兵加榮二命庶日賴
謀猷之助且漸還典誥之隆亟其來思副此虛佇所辭
宜不允

賜正奉大夫黃由辭免除寶謨閣學士提舉隆
興府玉隆萬壽宮恩命不允詔

勅具悉朕篤舊以恩每務存伐木之義退人以禮不忍
蹈墜淵之譏庶全忠厚之風益廣和平之福卿蚤緣迪
簡服在禁嚴資善從游嘗與橫經之列甘泉入侍屢躋
聽履之班屬此退休可無優數畀真祠於南浦還邃職
於西清朕於待泰府之僚厥惟加厚卿其存魏闕之念
毋替效忠往體至懷亟祗茂渥所辭宜不允

賜寶謨閣直學士朝議大夫知建康府兼江淮
制置使黃度乞檢會前奏許令致仕不允詔

勅具悉朕觀宣王之雅曰鴻鴈于飛肅肅其羽當時之
民流散失職若是其甚也又曰之子于征劬勞于野當
時之侯伯卿士勤求民隱若是其至也用能使百堵作
而民安宅焉其功豈一日之積哉間者邊事驟興江淮
之間驛騷者數載殆亡異鴻鴈之詩也而卿以儒學之
宗任師帥之責推劬勞之心以行安輯之政我民告饑
卿實哺之我民告疾卿實蘇之嚴追胥之令而盜賊銷
汰冗食之兵而財用足元元用安舊觀寢復卿之力也

民之說卿蓋若鄭人之歌子產而朕輕聽其去可乎矧
聞政事之閒不廢講論之樂從容卧治足以自安何必
退休以孤衆望所請宜不允

賜端明殿學士通奉大夫簽書樞密院事兼太
子賓客宇文紹節乞退休不允詔

勅具悉朕聞有國之勢蓋以得人為彊郤夾谷之俘則
裔夷不敢謀夏浞池之辨則彊秦亡復加兵况朝廷
輔弼之崇實中外觀瞻所繫非平時素有折衝之畧則

臨事寧無失七之驚卿學問高明知謀闕達蔚以儒者
兼備武文之材自為從臣已稱將相之器延登三祀勵
翼一心烽沈疆場之間稜卷江湖之上政須碩望以重
籌維庶幾銷事變於未形抑亦顯世臣之有後遽茲求
退匪朕欲聞所請宜不允

賜煥章閣直學士朝散郎知平江府趙希懌辭
免除顯謨閣直學士差知太平州恩命不允

詔

勅具悉日者聽朝于垂拱二三大臣以姑孰缺守聞朕
睦焉西顧曰此東晉以來名鎮也俗淳事簡有承平之
遺風焉非平易近民如魯伯禽清靜不擾如齊相國莫
宜居之惟卿持身之德簡而廉愛人之心惠而篤遠揀
良牧孰如卿宜此丙寅之詔所以有易地進律之寵也
况卿前在鍾陵當警備之日比守吳門適旱澇之餘勞
來撫摩功績懋矣閔勞而處以佚非朕待遇近臣之至
意乎式適其驅慰彼黎庶所辭宜不允

賜端明殿學士通奉大夫簽書樞密院事兼太子賓客宇文紹節再乞祿之閒散示以保全
不允不得再有陳請詔

勅具悉朕緬懷先正嘗位機庭當王室多艱之時為人
臣狗義之倡鬻旃海上莫回蘇武之心掘坎庭中卒奮
真卿之節至今烈士猶仰英風蓋將為世立臣子之防
夫豈計一門享忠誼之報卿家傳正學躬負偉材護戎
幕則底綏靖之勲踐政途則多弼亮之益克有令聞肖

于前人所當體予眷倚之誠懋乃經綸之業使中外寧
一民俗阜康豈惟朕心有望於卿抑亦爾祖所期於後
若乃道方行而遽畫功未竟而言歸俾予獲棄賢之譏
而卿亦負克家之責於義兩失將奚取焉勉聽朕言往
究爾韞所請宜不允不得再有陳請

賜端明殿學士太中大夫衛涇再辭免除資政
殿學士知潭州恩命不允詔

勅具悉朕以孟春元日御紫宸朝三事大夫濟濟在列

緬惟更化之日厥有輔政之臣勤勞百為功績用懋久
安閒館未愜予心是用加祕殿隆名俾鎮方岳夫當三
陽彙進之初而褒德錄賢以順天令古之道也卿當深
體此意式邁其驅布宣詔條推廣德澤惠綏田里勸課
農桑使胡相一道熙然於春風和氣中此朕所圖於舊
弼者再命而僕非所欲聞所辭宜不允

賜朝議大夫權工部尚書兼修國史兼實錄院
同修撰兼太子詹事戴溪乞許納祿或畀祠

祿不允詔

勅具悉昔唐白居易以直道不容于時故年甫六十九
辭宮傳之秩而歸休焉清名高行後世所慕望而不可
及也雖然居易則誠賢矣苟時君能挽而留之用其言
以顯其身使居易無勇退之名而唐室獲任賢之福豈
不尤可尚耶今卿以白傳之年而數上澗槃之請豈非
聞其風而興起者乎夫年未至而告歸在卿固為高致
知賢而不盡用天下其謂朕何勉從吾遊毋使識者窺

朝廷也所請宜不允

賜朝議大夫試尚書吏部侍郎兼中書舍人兼

太子右庶子兼同修國史實錄院同修撰曾

從龍辭免兼給事中兼直學士院日下供職

恩命不允詔

勅具悉東西分臺均於裨國論內外有制皆以代王言
然而六曹之押豈如瑣闥之嚴五字之除未若禁林之
重御學窮百氏名冠諸儒議論正而弗阿文章簡而有

法以還詔之直必能為予謹命令之源以演誥之工必
能為予顯典冊之寄在昔乾道有臣克家實繇平奏之
司無備擣文之對其抒素蘊以繼前修蓋將為邦國之
華何止盛鄉閭之觀亟祇茂渥寧事多辭所辭宜不允
賜正奉大夫參知政事兼太子賓客樓鑰乞歸
田里不允詔

勅具悉卿以耆艾之齡貳鈞衡之寄陟降九陛不若山
林之安憂勤百為寧如燕閒之樂此靳去之章所以屢

陳而未已也然而天生髦俊本以為人材者常躬天下之勞智者常任天下之患雖願為庸人而莫得其可徇私志以圖安哉矧惟賢哲之逢辰率多既老而後達若必引年而謝事守禮以乞身則渭濱黃髮之叟不得以究鷹揚之功而高蹈商山者不當起為羽翼之助矣朕意未可卿其思焉所請宜不允

賜奉國軍承宣使知閭門事兼賓省四方館事
兼提點御前忠佐軍頭引見司楊谷乞昇祠

祿不允詔

勅具悉卿柔惠且直蹈申伯之風退遜不驕秉寶君之
節藹然譽處簡在朕心方資肺腑之良重吾賓閣之寄
而上書求退為之憮然昔詩人以王事靡盬興不遑將
父之嘆今卿雍容朝謁無從事獨賢之勞而安車數過
有擊鮮娛侍之樂維忠與孝何廢兩全勉服殿官毋重
請也所請宜不允

賜中大夫試禮部尚書兼侍讀兼修玉牒官章

穎乞引年致仕歸休田里不允詔

勅具悉朝廷所尊實無爵德典刑雖重未若老成卿造
道深醇養氣剛大在紹熙末以讜言位諫列迨慶元初
以直道忤柄臣棲遲十年連塞三紕多士宗其高行當
世謂之正人自歸踐於禁塗仍首陪於經席漢庭皆憚
汲黯凜骨鯁之未衰商宗舊學甘盤喜儀刑之復見親
賢方篤避位何名尚殫入告之猷毋徇退休之志所請
宜不允

賜中大夫章穎辭免除寶謨閣學士恩命不允

詔

勅具悉昔我烈考博求當世之彥以從朕於潛藩二十
餘年之間老成凋零存者無幾嗟念疇昔怒焉興懷環
瞻在廷獨卿寔舊顧可輕聽其去哉而引年之章屢卻
復上夫尊者艾重朝廷朕之本志也礪廉隅知止足卿
之至情也朕既不獲留卿于近班亦豈不能賁卿以異
數延閣之命人誰間言往服新榮以燕里社所辭宜不

允

賜光祿大夫右丞相兼樞密使兼太子少師史
彌遠辭免以皇太子講授春秋終篇特與轉
一官恩命不允詔

勅具悉朕惟太子天下之本非務學無以克德性之尊
春秋王道之衡非親師無以究聖言之秘卿識超物表
行冠儒先久陪鶴禁之游備闡麟經之蘊使二百年衰
敗之要指悉融會於胸中而十數家傳注之遺文不拘

牽於紙上卿之力也朕甚嘉之夫弼元良以基萬世之
安厥功為大循典常以疏一秩之寵於賞猶輕毋庸固
辭往即祇命所辭宜不允

賜太中大夫知樞密院事雷孝友正奉大夫參
知政事樓鑰太中大夫同知樞密院事章良
能端明殿學士通奉大夫簽書樞密院事字
文紹節兼太子賓客辭免皇太子講授春秋
終篇各特與轉行一官不允詔

勅具悉昔晉侯以羊舌肸習于春秋使傅太子彪楚莊
王問教太子之道於申叔時亦必春秋為首是時麟經
未作二臣所學蓋禱祝之類耳孰若取聖人之微言擇
天下之端士以訓導元子如今日之懿哉卿等爵以鴻
儒參陪國論事機之暇從吾兒游究終始於遺經迪高
明於德性其為益大矣進官一等茲謂故常陳義固辭
殊非所望所辭宜不允

賜朝議大夫試尚書吏部侍郎兼太子右庶子

兼同修國史實錄院同修撰兼給事中兼直
學士院曾從龍辭免皇太子講授春秋終篇
特與轉行一官懇命不允詔

勅具悉朕惟三代饗國之長原於太子六經致治之法
脩在春秋博求孝悌道術之英推明是非褒貶之旨而
卿越繇時望久與賓僚每敷繹於聖言以養成於儲德
俾玉裕淵冲之愈粹猶膏潤水釋而不知載嘉爾勞命
晉之秩顧循墻而有請欲反汗其謂何往服褒崇之恩

益殫輔導之力所辭宜不允

賜顯謨閣直學士朝散郎知太平軍州事兼管

內勸農營田使趙希懌乞昇祠祿不允詔

勅具悉朕惟用苛媿以勝姦不若清靜而民自化求武
健以濟事不若循良而物自安故擇蕃宣之臣必先慈
惠之長雖泯然風采歲月未見其功而培我本根國家
實蒙其利卿秉心和裕為時德人布政寬平如古賢牧
比上全吳之印亟昇當塗之麾申伯相攸莫如南土之

樂汲黯卧治足底淮陽之清遽茲求閒非朕所望所請
宜不允

賜中大夫試尚書吏部侍郎兼中書舍人兼同
修國史兼實錄院同修撰兼侍讀俞烈辭免
經筵進講周易終篇侍讀官特與轉行一官
恩命不允詔

勅具悉朕若稽先朝最重易學對昭素於便殿緬懷藝
祖之風命李覺於成均載仰太宗之懿顧如冲眇敢廢

講論韋編幾至於絕三卦畫冀明於重六卿為時鴻碩
密侍燕閒每當從容訪問之餘盡發潔靜精微之蘊俾
予上窺天地之奧遠究聖賢之心體純乾之運而知剛
健之德當修研交泰之旨而使上下之情無壅既懋格
君之益可忘增秩之褒亟拜渙恩毋庸巽避所辭宜不
允

賜通議大夫知樞密院事兼參知政事雷孝友
宣奉大夫參知政事樓鑰通議大夫同知樞

密院事宇文紹節兼太子賓客辭免皇太子
讀三朝實訓終篇並特與轉行一官不允詔
勅孝友等具悉朕觀三代盛時惟先王彞訓是式如奉
拱壁如寶大龜兢兢焉罔敢失墜是以皇祖之訓著于
夏書文王之謨述于周命故能保世滋大以敷遺後人
休惟我三朝格言大法具在一書猶古二典朕固嘗讀
之于經惟復命羣儒以授儲禁俾吾元子知創業守文
之艱明修身治國之要懋敬厥德以對于前人其為益

大矣終篇論賞徧于官僚豈吾大臣迺獨弗及朕命不
易往惟欽哉所辭宜不允

賜太中大夫權吏部尚書兼太子詹事汪遠中

大夫權工部尚書兼太子詹事戴溪中大夫

試尚書吏部侍郎兼太子右庶子曾從龍辭

免以皇太子讀三朝寶訓終篇推賞各與轉

一官恩命不允詔

勅具悉朕觀隆古盛時之治動惟先王成憲之師五子

之歌具陳皇祖之訓君牙之命亦述文王之謨此三代所繇以久長予一人敢忘於做法矧烈祖神宗之相授有格言大典之具垂既常率是以御邦茲復用之而教子卿等越由時望久翊儲闈當橫帙之從容每殫誠於啟沃俾元良養德之日茂知列聖詒謀之易遵有嘉輔導之功可緩褒崇之渥往其祗命毋或固辭所辭宜不允

賜寶謨閣直學士朝議大夫知建康軍府事黃

度辭免除權禮部尚書兼侍讀恩命不允詔
勅具悉朕聞之傳曰禮之為國與天地並書曰事不師
古以克永世匪說攸聞大哉禮乎不可以一朝廢也大
哉學乎不可以斯須已也粵惟眇躬燭理尚淺方將洽
神人而和上下考成敗以鑑古今以卿深窮周公致平
之書獨抱孟子敬王之志久去邇列渴聞嘉猷故命居
夷夔之官俾日陳堯舜之道屬任之意豈輕也哉夫老
成進則國體自尊正人用則治表可見朕方虛佇以茲

造朝陳義固辭良非所望所辭宜不允

賜中大夫試吏部侍郎兼太子右庶子兼同修
國史實錄院同修撰兼給事中兼直學士院
曾從龍辭免權刑部尚書兼職依舊日下供
職恩命不允詔

勅具悉朕觀古人之論刑也不曰惟克天德自作元命
則曰凡制五刑必即天論蓋用刑之權本出于天人主
與有司特奉行之耳今吾士大夫以刑為職者非一而

大司寇實總獄之成以告于朝是蓋佐朕行天討者也
任非其人命曰褻天朕敢乎哉卿氣嚴行方守以忠恕
必能為國謹惜民命茲庸俾爾進長于秋官卿其祇服
迺司推不忍之心行無私之法庶幾對越上帝以迓無
疆之休顧不偉哉退託弗能殊非所望所辭宜不允

賜太中大夫權吏部尚書兼太子詹事兼同修
國史兼實錄院同修撰汪遠辭免除吏部尚
書兼職依舊恩命不允詔

勅具悉朕因讀易有感乎復之彖曰利有攸往剛長也夫陽升則陰伏君子盛則小人消興替之源靡不繇此茲用並登羣賢穆布邇列蓋一日而進擢者數人焉所以廣衆正之塗重本朝之體也卿以儒宗陪禁從謹言直道實似其先肆命正天官之除首常伯之位論思啟沃實朕無過之地自今益有望於卿選舉清平直餘事耳尚體斯意何以辭為所辭宜不允

賜通議大夫試刑部尚書兼詳定勅令李大性

辭免除兵部尚書兼職依舊恩命不允詔

勅具悉朕以兼覆為度不忍毒民於兵載尋邦盟以息邊警然修文德以徠不服雖本至仁而除戎器以戒不虞抑存遠慮肆求者括俾長夏官示整戎經武之未忘亦折衝銷萌之有賴卿夙推峻望獨負壯猷名聞朔陲蠻貊亦可行矣惠洽南夏江漢至今賴之比趣來歸忻聆入告雖曰明刑而弼教未如掌伐以正邦庶資老謀以肅軍政成命弗易多辭奚為所辭宜不允

賜中大夫新除工部尚書兼同修國史兼實錄
院同修撰兼太子詹事戴溪辭免陞兼修國

史兼實錄院修撰恩命不允詔

勅具悉朕聞之記曰屬辭比事而不亂則深於春秋者
也居述史之官而不明聖人筆削之指其能勝任者幾
希卿為時儒先篤志經學蓋於尊王黜伯之誼賞善罰
惡之權混融貫通如指諸掌發凡起例固所優為今三
朝之典未免闕遺甲寅之記尚多抵牾正賴鴻筆勒成

信書矧卿與遠俱慶元史官之舊並命修纂人皆謂宜往彈副墨之塵以究汗青之緒所辭宜不允

賜吏部尚書兼太子詹事汪遠工部尚書兼太子詹事戴溪權刑部尚書兼太子右庶子曾從龍辭免皇太子講授周易終篇推恩特與轉行一官不允詔

勅具悉昔漢明帝之為太子授經於名儒劉昆然昆之易學本于京氏以區區占驗之術欲以成溫文之懿豈

不由卻行而求前乎今朕博選俊髦輔導吾子惟卿師友淵源粹然出正用能發三聖精微之蘊裨元良聚辨之功俾畜德日新震器增重以此受賞豈為無名抗章力辭非朕志也所辭宜不允

賜太中大夫新除吏部尚書兼太子詹事汪達
兼同修國史兼實錄院同修撰辭免陞兼修
國史兼實錄修撰不允詔

勅具悉朕惟古之太史必世其官下至兩漢司馬氏班

氏父子猶以雄文麗藻擅制作之盛後之論史者首稽焉惟乃先正以名世鉅儒受知我烈祖實繇銓衡之長顛筆削之權距今餘四十年朕復命卿嗣掌厥事豈欲以一職為卿榮哉顧今三朝之典未免闕遺甲寅之記尚多牴牾往率厥屬勒成信書使班馬氏不得專美于前此卿所當自期者抗章避寵豈朕欲聞所辭宜不允

賜朝奉大夫試中書舍人兼權禮部侍郎兼修

玉牒官兼侍讀范之柔辭免除禮部侍郎兼

中書舍人恩命不允詔

勅具悉朕惟慶歷元祐之盛若文正忠宣之賢雖聖人
吾不見之歎九原之莫作然故家猶有存者蓋百世而
復興卿蚤傳韋氏之經克寶鄭公之笏其踐諫省以謹
論沃朕心其登綸闈以英辭華國體矧邦典攝丞之既
久於禮文參訂以尤多載嘉爾勤就正厥秩朕方慨慕
先朝之烈卿其勉追迺祖之風用副隆知奚煩多遜所
辭宜不允

賜通奉大夫守吏部尚書兼太子詹事兼修國史兼實錄院修撰汪遠乞休致不允詔

勅具悉朕延登正人穆布邇列賴朝夕論思之益建國家久長之基卿學為一代之宗位處六官之長觀瞻共屬倚注尤深所當以邁往之氣而出憂時之言以康濟之材而抒及物之韞使朕獲老成之用而世知儒者之功豈惟多士有望于卿抑亦先正所期于後若乃道方行而遽畫年甫至而求歸既非眇冲擢任之本心亦豈

平昔自期之壯志尚安厥位勿復有陳所請宜不允

賜通議大夫同知樞密院事兼太子賓客章良

能乞在外宮觀不允詔

勅具悉朕不見卿數月矣以朕懷卿欲見之心知卿未
忘於朕也屬聞有瘳則為之喜入對便朝體力如故則
又加喜焉顧方日親嘉謀以輔不逮而需章遽上若不
容一日留何哉夫恩義相須誠如來奏傳曰為人臣者
無以有己此義之大者也若乃圖一身之便安而忘眷

倚之至重又焉得為義乎以卿之明當知所擇悉心思報毋或他云所請宜不允

賜少保師揆辭免除少傅依前皇伯奉國軍節度使充萬壽觀使嗣秀王加食邑食實封恩命不允詔

勅具悉朕更新治化于茲累年農疇屢登邊鄙不聳豈予一人所能致哉蓋天地祖宗之靈實嘉相之也是用迎日之至躬展美報以對越于神休而禮行之夕瑞應

響答雲物卷稷月星舒華亦豈予一人所能致哉羣工
庶正與我一二族老實顯相之也已事而竣既施澤於
中外矣明德茂親有如伯父其可無以表異之乎孤傳
之崇以待者喆朕命弗易毋煩控詞所辭宜不允

賜光祿大夫樓鑰辭免除資政殿學士知太平

州恩命不允詔

勅具悉朕當開禧改絰之日首思慶元曳履之臣聘用
里於商山在廷咸竦舍中公於魯邸視古有光擢在通

聯進參大政謀猷足以經萬務德望足以師百僚予維倚毗士有矜式屬嬰微疾遽驚歸心披告老之章殆幾八九諭貪賢之指亦既再三確爾莫回為之太息念累歲與廟堂之畫厥有成勞顧一朝上印綬而歸可無異數通班秘殿偃息便藩朕猶有憊于中卿尚何辭之力亟祇茂渥庸副至懷所辭宜不允

賜光祿大夫新除資政殿學士樓鑰辭免除資政殿大學士在京宮觀任便居住恩命不允

詔

勅具悉朕惟昔者耆舊之臣蓋或起於燕閒之後遠稽漢室若園公綺里季之肯來近憶阜陵若張燾辛次膺之復用考其在列曾不幾時未有更東西兩地之崇歷先後六年之久凡更化以來之規畫賴同心相與以扶持迄成庶邦嘉靖之休居多元老弼諧之助悵挽留之莫遂顧䟽寵以宜優冠秘職於殿廬領真祠於轂下身安晚節未容居易之退休國有大疑尚冀仲舒之就問

往欽時命毋有遐心所辭宜不允

賜起復正議大夫右丞相兼樞密使兼太子少

師史彌遠辭免特授正奉大夫加食邑食實

封恩命不允詔

勅具悉國朝之制凡大典禮大慶賚丞相率居其先焉
所以重朝廷尊庶陛今朕消日陳儀冊拜元子恩典之
行宜自卿始而逡巡固避至于再三越既崇舊弼獎族
老而後及卿所以屈彛章伸雅素者不為不至矣尚欲

力辭非予所敢知也所辭宜不允

賜起復正議大夫右丞相兼樞密使兼太子少師史彌遠再上奏劄子辭免以皇太子冊寶推恩特授正奉大夫加食邑食實封恩命不允更不得再有陳請詔

勅具悉朕以卿輔翼元儲功德茂盛考循故實命晉文陛而控避之章既卻復上前所諭答固已諄諄胡為確然不易所守夫崇德報功國之典也辭榮避寵卿之心

也卿欲行志朕欲行禮志與禮孰重卿其思焉所辭宜不允

賜通議大夫試工部尚書兼修國史兼實錄院修撰兼太子詹事戴溪乞許納祿休致不允

詔

勅具悉昔漢疏廣為東宮傅自以宦成名立浩然勇退論者高之夫知止之風在廣誠可嘉矣然知其賢而許之去豈非宣帝與太子之責哉今卿經學深明德行醇

茂朕既倍之自近而吾元子尊師重道尤不可一日無
卿祖張都門揮金田里悃誠雖切誼未可從所請宜不
允

西山文集卷二十一

欽定四庫全書

西山文集卷二十二

宋 真德秀 撰

翰林詞草

答詔

賜金紫光祿大夫右丞相史彌遠辭免進呈安
奉三祖下第七世仙源類譜高宗皇帝寶訓
今上皇帝玉牒今上皇帝會要禮畢三局提

舉官并進呈安奉玉牒禮儀使各特與轉兩
官依例加恩令學士院降詔恩命不允詔

勅具悉日卿總領諸儒以四書來上稜容縟典視昔有
加或謂一時文物之盛而已孰知其深助朕德而有裨
治功哉蓋攬宗支之籍則思睦族不可忘讀典謨之訓
則思成憲不可失若朕涼菲雖微足書然行一政令而
史牒紀之講一典禮而會要傳之使予惕然益知為君
之難者亦書之力也卿以鴻儒提鉅筆又以元宰贊盛

儀懋賞之行其曷可後往恭朕命毋復異詞所辭宜不允

賜正議大夫知樞密院事兼參知政事兼太子賓客雷孝友再上奏劄子乞歸休田里不允不得再有陳請詔

勅具悉朕內修經國之摹外講安邊之畫念端委廟堂而共政惟二三臣苟折衝尊俎之有人賢十萬衆卿以魁壘之器雄剛之材正色立朝真後凋之松柏同心輔

政有相濟之鹽梅當夙宵圖入之秋正上下交修之日
眷時邇列稀若晨星獨我老成屹如砥柱俾朕躬之有
賴諒天意之使然與其志在丘園冀私情之適孰若心
存社稷合大義之公往佩予言勉綏爾位所請宜不允
不得再有陳請

賜正奉大夫守吏部尚書兼太子詹事兼修國
史兼實錄院同修撰汪遠辭免除顯謨閣學
士提舉佑神觀依舊兼太子詹事兼修國史

實錄院同修撰仍令赴四參恩命不允詔

勅具悉朕以尊用老成為重挽之惟恐弗留卿以保全名節為高去之惟恐不力故於二者思擇其中釋銓筦而侍真祠所以示閔勞之意列清廂而輔儲禁所以示貧賢之心卿猶固辭其誼安在所辭宜不允

賜寶謨閣直學士中大夫新知漳州府劉光祖
乞提舉宮觀一次不允詔

勅具悉昔在先朝有臣趙抃立朝則忠於君治郡則仁

於民朕緬懷遺風謂不復見求之當世迺得其人卿以剛毅正直之資兼慈祥樂易之德曩司言責誠節貫於天淵比典藩維惠澤流於江漢揆諸前哲異世同心維時梓潼繫乃舊服徒得君重慰吾父老子弟之思政雖家居何以過此奉祠之請非所欲聞所請宜不允

賜正議大夫守兵部尚書兼詳定勅令官兼權吏部尚書李大性辭免除吏部尚書兼職依舊日下供職恩命不允詔

勅具悉朕惟銓綜之寄古今所難雖一定若權衡蓋自有不欺之法非至明如水鏡豈能勝無窮之姦故法非人而莫行官以人而後重而况職亞近輔位尊文昌必得耆舊之臣乃當選用之意卿蚤列法從為時名流博貫羣書於典章尤所該洽周行萬里於情偽靡不照知必能以鑒裁之公收平允之譽往共乃職稱朕志焉所辭宜不允

賜通奉大夫權刑部尚書兼太子右庶子兼同

修國史實錄院同修撰兼給事中兼直學士
院曾從龍辭免除禮部尚書兼職並依舊日
下供職恩命不允詔

勅具悉昔虞書之論天秩實在天討之先周官之設邦
刑列於邦禮之後蓋法令特輔治之具而教化有範民
之功朕方修明舊章蒐舉隆典自非當世豪英之士孰
識古人制作之源卿學足以致知才足以大受廣廷待
問首陳彊勉力行之言壯歲躋榮已著老成重德之望

惟時宗伯政待鴻儒與其嬰簿書獄訟之勞孰若付俎
豆禮文之事庶因稽古之暇采盡告猷之忠往悉乃心
庸稱朕志所辭宜不允

賜通奉大夫新除禮部尚書兼太子右庶子兼
同修國史實錄院同修撰兼給事中兼直學
士院曾從龍辭免兼實錄院修撰恩命不允

詔

勅具悉朕觀咸平之世去太祖太宗未遠也而我章聖

皇帝喟然深念亟命纂修正史於是名臣揚億輩實膺
是選越五載而書用成筆削得人其效如此於惟中興
三聖授受功德盛矣而汗青之典猶未就緒朕甚慙焉
卿文紹卿雲學富班馬必能以大手筆成一家言往哉
勿辭副朕所望所辭宜不允

賜資政殿大學士正議大夫知興元軍府事兼
管內勸農營田使充利州路安撫使馬步軍
都總管四川制置大使安丙辭免除同知樞密

院事兼太子賓客日下起發赴院治事恩命

不允詔

勅具悉昔在阜陵之盛緬懷蜀道之難選任惟精率取
一時之傑功庸既懋必躋兩地之嚴仰窺宏摹厥有深
旨卿以魁壘之器雄剛之材忠義貫乎神明威名震乎
戎落百年彝鼎丕昭曠世之勲萬里岷峨坐復承平之
觀念宣勞之浸久豈圖任之可忘渴聞話言想見風采
肆擢陪於右府併參護於春宮顧南渡中興以來餘八

十載若西州與政之彥凡六七人皆嘗服采於朝始拜
登庸之寵維卿殊遇眡昔甚儔宜追聞命引道之風庸
副側席待賢之意所辭宜不允

賜顯謨閣直學士太中大夫知潼川軍府事兼
管內勸農使兼提舉潼川府界渠州懷安等
軍兵巡檢盜賊公事劉甲辭免除寶謨閣學
士知興元府兼本路安撫使填見闕兼節制
本路屯戍軍馬就送還人限一日起發之任

候任滿前來奏事時暫兼權四川制置司職
事恩命不允詔

勅具悉朕顧瞻南鄭屏蔽西陲鄰境多虞政保邊之當
急元戎新易念謀帥之孔艱非威名素著不足以懾敵
心非恩信久孚不足以慰民望博參於衆未有如卿故
擢專帥閭之雄仍暫領制垣之重庶幾麾幟弗改而氣
自精明鈇鉞未施而人自畏服此朕仰成之本意亦卿
夙負之壯猶胡為抗章未即引道夫勞法從以劇煩之

寄屈高年於扞禦之衝顧朕至懷良非獲已諒以惡病
遜夷之素必無辭難就伏之私亟拜恩徽寬吾憂顧所
辭宜不允

賜資政殿學士通議大夫知潭州軍州事兼管
內勸農營田使充荆湖南路安撫使馬步軍
都總管衛涇辭免除資政殿大學士知隆興
府江西安撫使填見闕恩命不允詔

勅具悉朕惟尊方鎮之權所以衛王室優大臣之禮所

以重朝廷卿夙負軼材蔚為偉器參國枋於萬化更新
之日有彌縫輔贊之功建帥旄於一方甫定之餘有鎮
靜綏懷之畧顧方深於嘉賴迺婁丐於歸休為爾相攸
莫如自近大江西南綿數千里昔稱會府之雄中興收
伯餘四十人半用政塗之舊申加隆委就陟寵名使周
邦喜良翰之臨知朕志軫斯民之厚尚體茲意毋為固
辭所辭宜不允

賜朝議大夫試尚書禮部侍郎兼中書舍人兼

修玉牒官兼侍讀范之柔辭免權刑部尚書
日下供職思命不允詔

勅具悉維我皇祖肇開邦國首除五季之淫刑浸復成
周之中典俾天下元元之蕃庶各保其生而國家世世
之康寧皆基於此顧朕涼菲敢忘纘承肆擇儒英進司
邦禁庶闡洽德好生之化以為祈天永命之原卿剛毅
而裕和清明而簡重博參於衆宜在此官昔文正議重
約之刑不欲開人主以殺戮之漸忠宣爭新州之獄獨

思為朝廷存長厚之風諒惟世臣深識此意亟其抵服
副朕選掄所辭宜不允

賜資政殿學士通議大夫知潭州衛涇上表再
辭免除資政殿大學士知隆興府江西安撫
使恩命不允不得再有陳請詔

勅具悉日者豫章郡以缺牧聞朕眷焉西顧曰此孝宗
皇帝龍潛之舊服也襟江而帶湖物衆而地大非吾股
肱舊人功在王室而澤在生民莫宜居之顧咨近臣咸

以卿對朕於是有五月乙亥之詔焉詩不云虘在彼無
惡在此無斃夫能使政孚於湖南而不能使化行於江
右者非所聞也亟脂而車庸答民望所辭宜不允不得
再有陳請

賜資政殿大學士正議大夫安丙辭免除觀文
殿大學士知潭州兼荆湖南路安撫使填見
闕恩命不允詔

勅具悉朕以卿威名夙著宜入贊機廷卿迺以疾疾自

言願退休祠館將必行朕命則非所以示閔勞之心若
遽聽卿歸又非所以盡貪賢之誼深求其當宜適厥中
維紫宸於近職為獨高維星沙於外藩為最佚寵名赫
奕實均廊廟之瞻嘯傲優游仍遂湖山之樂其體相攸
之意毋形知止之言所辭宜不允

賜金紫光祿大夫右丞相兼樞密使兼太子少
師魯國公史彌遠辭免以皇太子講毛詩終
篇特與轉行一官恩命不允詔

勅具悉朕通觀前代之隆莫重元良之教出則有師入則有保既皆選用於正人邇之事父遠之事君欲使深明於大義惟六詩之當究在三善以尤先卿蔚以鴻儒久陪鶴禁周旋羽翼獨高園綺之功導廸性情匪顯毛鄭之學屬摭終篇之奏徧推橫帙之褒矧吾元臣可後寵秩其祗予命益既廼心所辭宜不允

賜禮部尚書兼太子詹事兼給事中兼直學士

院曾從龍華文閣學士兼太子詹事戴溪刑

部侍郎兼太子左諭德劉燾辭免以皇太子
講毛詩終篇各特與轉行一官恩命不允詔
勅具悉朕惟求多聞乃有獲實哲王永世之規不學詩
無以言蓋聖門教子之灋肆疇端士俾翼元良必先六
義之陳以裨三善之懿卿心傳洙泗學陋毛韓其於從
容諷誦之間居多涵泳性情之益既終厥帙宜獎爾勞
其亟佩於寵光尚益厯於輔導所辭宜不允

賜資政殿大學士正議大夫安丙上表再辭免

除觀文殿學士知潭州兼荆湖南路安撫使
填見闕恩命不允不得再有陳請詔

勅具悉迺者念卿久勞於外擢贊本兵之任冀聞告后
之猷疊摺來章具陳至意謂方脫瞿塘之險願少休荆
渚之間義雖急於親賢思尤先於從欲故待以宰臣之
禮而付之連帥之權蓋徇忱辭匪緣他故而卿乃惟多
言之是畏思勇退以自謀聞之憮然慮亦過矣朕方推
誠耆哲務全終始之恩卿其戮力國家勿以中外為間

所辭宜不允

賜金紫光祿大夫右丞相兼樞密使兼太子少師魯國公史彌遠辭免為進呈安奉高宗皇帝中興經武要略了畢提舉官就差禮儀使各特與轉兩官依例加恩令學士院降制恩命不允詔

勅具悉朕惟我烈祖以天授之資再造鴻業雖神機妙算不可迹窺至於整戎經武之方安邊制勝之畫布在

方策煥如日星其在涼菲敢忘取法肆命纂輯裁為一書歷年於茲迺克登奉提綱領使卿實顯之稽諸舊章其可不賞昔下武之詩為繼文而作也卿其輔朕懋建長策以明昭於前人光時乃朕志區區品秩何足以辭所辭宜不允

賜寶謨閣直學士朝議大夫前知成都府路安撫使黃疇若辭免除兵部尚書兼太子右庶子恩命不允詔

勅具悉維蜀萬里在天一方自昔祖宗之時已隆牧守
之寄當其臨遣必有以寵其行越既勞還必有以旌其
最卿曩繇繇列出撫遠民其威名立斷有張詠之風其
簡易弗苛如趙抃之政使蠶叢魚鳧之舊俗咸底樂生
雖白狼槃木之諸夷亦皆効順既寬西顧爰命東歸間
閣六年喜風神之尚壯諄勤三疏偉論議之可觀宜登
夏官常伯之聯併領春宮中護之職其思美報母事謙
辭所辭宜不允

賜朝議大夫新除權兵部尚書兼太子右庶子

黃疇若乞畀祠祿不允詔

勅具悉朕以卿去國六年守藩萬里念不見賈生之久
故式遄山甫之歸置之大司馬之聯寵以中庶子之職
方將屢趣燕閒之對俾罄所懷庶幾力陳鯁諤之規有
裨予聽偶茲移疾遽欲節安既非盡瘁事國之素心亦
豈側席待賢之本志其思加嗇亟底有瘳苟未遂於造
朝政何嫌於予告所請宜不允

批答

賜起復正議大夫右丞相兼樞密使兼太子少
師史彌遠再上表辭免皇太子冊寶推恩轉
行一官恩命不允仍斷來章批答

省表具之朕聞予奪不同惟功是眡辭受何常惟義之
歸當予而刊印非所以勸功宜受而循墻非所以合義
若昔聖賢之論尤嚴取舍之間苟有其名則兼金之重
孟子弗以為非不由其道則五兩之微揚雄猶以為秦

今卿輔成儲貳之德於朕蓋有社稷之勲祇進一官顧形三請夫贊龍樓之禮豈如衛翼之誠深伸虎拜之恭孰若師承之道重况循常典非出異恩宜悉眷懷毋煩

詞費所辭宜不允

來奏云以疾不及贊龍樓之禮伸虎拜之恭故云

賜嗣秀王師揆辭免除少保依前皇伯奉國軍

節度使充萬壽觀使加食邑食實封恩命不

允批答

省表具之三孤之官在周為寅亮天地之職今雖名存

實異然命數禮秩蓋與丞相等朕未嘗輕於授人也卿以溫良易直之資者明醇茂之識為宗室祭酒視儀三事亦既有年肆予考之彛章登拜亞保非獨侈鉅典之成而已亦俾振振麟趾之族知有德如卿然後足以當此位其為勸勵不既多乎亟其祇欽毋違朕命所辭宜不允

賜嗣濮王不儔上表再辭免特授檢校少保依前昭慶軍節度使提舉佑神觀嗣濮王加食

邑食實封恩命不允仍斷來章批答

省表具之夫建元子以奉粢盛褒同姓以壯藩翰其事雖殊其為尊祖重本一也孟子曰古之人所以大過人者無他善推其所為而已矣今朕因父子之親而施恩宗族非善推所為之誼虜方將以是勵風俗厚人倫以教天下之愛卿言雖力不得而從所辭宜不允仍斷來章

賜嗣秀王師揆再上表辭免除少保依前皇伯

奉國軍節度使充萬壽觀使加食邑食實封
恩命不允仍斷來章批答

省表具之朕讀詩至大雅曰懷德維寧宗子維城未嘗
不置書三歎也於虜有國家者其可不寵綏同姓以為
藩垣之助哉眇予小子嗣守丕緒惟修德以固宗子者
未嘗一日忘庶幾行葦忠厚之風興於今日而况予一
人伯父之尊三朝屬籍之老褒崇之典其庸可後乎升
華三孤亦既晚矣卿而不宜尚誰宜之趣祇朕恩毋或

多遜所辭宜不允仍斷來章

賜正議大夫史彌遠再上表辭免特授光祿大

夫右丞相兼樞密使兼太子少師奉化縣開

國公加食邑食實封恩命不允仍斷來章批

答

省表具之朕聞諸孟子曰所謂故國者非謂有喬木之謂也有世臣之謂也蓋惟世臣與國同體故當以安社稷為悅不當以辭爵位為高卿忠正勤勞素明斯誼迺

者繫然在疚尚能體眷倚之重勉服厥位以圖經綸之
功况今祥禫既終禮制無闕是固悉心輔政之日也甲
寅制書誕告有位羣工庶正僉曰允哉卿其祇服訓言
迪朕不逮君臣同心克享上帝以迓續無疆之休卿亦
與有無窮之聞豈不賢於辟寵之煩乎所辭宜不允仍
斷來章

賜光祿大夫右丞相兼樞密使兼太子少師史
彌遠再上表辭免皇太子講授春秋終篇特

與轉行一官恩命不允仍斷來章批答

省表具之昔漢明帝之為太子也能辨南陽之牘光武嘉之或謂其天資之美實然抑不知帝以十歲而通春秋揆事應物之權未有不繇學出者然以察為明而昧君人之體殆當時輔導者之責乎嗟吾元子蚤毓春宮而能建至策以安朝廷舉宏綱以尊君父非深窮春秋之大義者疇克知之夫非學無以通經非師無以明理磨礪浸灌日就厥德卿之力為多豈以訓迪之勞而忘褒

陟之寵忱辭雖切匪朕欲聞所辭宜不允

賜太中大夫知樞密院事雷孝友正奉大夫參
知政事樓鑰太中大夫同知樞密院事章良
能端明殿學士通奉大夫簽書樞密院事宇文
紹節兼太子賓客再上表辭免皇太子講授
春秋終篇各特與轉行一官恩命不允仍斷
來章批答

省表具之朕惟三代之教太子必使明孝仁義禮之經

六藝之有春秋所以著父子君臣之道博求鴻碩敷闡
精微卿以股肱之良參羽翼之重雖靡勞於請說實深
賴於儀刑越既終篇所宜論賞夫學為王者事匪專多
訊之勤而習與正人居自有不言之益云胡抗奏自托
罔功明兩作離當免禪於令德日三成魄毋徒貢於謙
言所辭宜不允仍斷來章

賜文武百寮宰臣史彌遠等上表奏請皇帝御
殿復膳不允批答

省表具之朕以眇身獲承宗廟常懼弗稱以累付託之
明屬者風霆之警厥證甚異惟德菲薄掩於政理故天
動威以顯朕缺在易有之洊雷震君子以恐懼修省是
用惕然貶食避殿蓋不若是無以見朕畏威罪己之誠
惟卿等協同一心飭正庶事以輔予不逮廼所望也若
夫抗章所陳蘄復常度顧朕寡昧方念弗足以御九筵
之峻享四海之珍省愆未皇其敢議此尚體斯意毋重
有云所請宜不允

賜文武百寮宰臣史彌遠等上表再奏請皇帝

御殿復膳不允批答

省表具之朕惟天人之應有若合符言之微皆足致
異比以烈風雷雨之警惕若上帝祖宗之臨遇災何止
於側身方食殆幾於失匕亟虛正宁仍卻珍羞雖盡行
挹損之文尚恐非感通之實而未逾信宿遽復故常雖
衆志之願然在眇躬其安敢况屬郊禋之邇正蕪神聽
之歆當益懋於寅畏庶遑臻於昭假朕固有待卿毋重

陳所請宜不允

賜史丞相彌遠再辭免皇太子讀三朝寶訓終
篇轉行一官恩命不允批答

省表具之朕惟治效之隆替原於家法之廢興使夏之
嗣王常遵大禹之戒而周之奕世弗墜文王之謨永平
故事與漢以俱存正觀元龜終唐而克鑒則其享國之
有永詎止如今之所觀肆惟眇躬祗蹈先訓寶若珪璧
銘之槃杆既以是而飭身復用之而教子庶一道之相

繼視百王而有光卿以元愷之才居綺園之任陪輔最久講明獨深俾重暉之德愈新而磐石之基益壯此而弗賞何以懋功陳義固辭豈朕所望所辭宜不允

賜光祿大夫右丞相兼樞密使兼太子少師永國公史彌遠上表再辭免勅令所修進吏部條法總類及百司吏職補授法了畢特轉兩官依例加恩仍進封魯國公令學士院降制恩命不允批答

省表具之卿以經世之學佐王之謩自登翼於萬幾首
整齊於百度羣材彙進蔚有慶厯元祐之風公道砥平
浸還乾道淳熙之舊復以餘力裁成信書近酌唐銓別薦
紳之流品遠參漢律旌刀筆之勞能坦然甚明來者可
考如權衡之設輕重不得而私若涇渭之分清濁靡容
其混迄底章程之定允資筆削之嚴渙汗甫頒謙辭已
上知卿盛德居存避寵之心顧國舊章難廢懋功之典
往欽詔諭亟服恩徽所辭宜不允

賜吳琰上表再辭免除檢校少保加食邑食實
封恩命不允仍斷來章批答

省表具之朕博觀圖史之傳歷考后妃之德苟內助之
賢嘗有功於社稷則外家之福必流及於子孫故周之
任姒世為諸侯而漢之馬鄧門多賢者天道非遠較然
可知維我國家壺儀最盛是生聖后光輔中興保佑三
朝與定大策功德之懿有光前聞肆卿一門寵榮烏奕
將旒公袞先後相望而自比年以來老成凋落環顧近

屬惟卿獨存慨然興懷思所以褒異者久矣郊禋大慶
中外所同揚於大廷俾眡孤保所以報層闡之恩而為
戚里之勸也朕志有在卿其勿辭所辭宜不允仍斷來
章

賜通奉大夫參知政事兼太子賓客章良能上
表再辭免今上皇帝會要禮畢轉官恩命不
允仍斷來章批答

省表具之昔魯邦之寢敵謀在能秉於周禮世祖之恢

皇業由復用於漢儀則知典法之廢興實繫國家之隆替於惟我宋近酌有唐勒成會粹之書具紀施行之實使後世由之而稽決有司即是而討論豈曰空文厥惟鉅典而卿蔚以使領相予禮容既登奉之告成豈褒宗之敢後往祇渙命勉抑謙詞所辭宜不允仍斷來章

賜通奉大夫知樞密院事兼參知政事兼太子賓客雷孝友上表再辭免進呈安奉高宗皇帝寶訓禮畢轉官恩命不允仍斷來章批答

省表具之惟治道之隆替原於家法之廢興使夏之嗣
王常遵大禹之戒而周之奕世弗墜文王之謨則其饗
國之甚長何止如今之所睹緬惟高廟載造我家凡其
一話一言莫匪大經大法念既服行於平日更將詔示
於後人肆命纂修武嚴登進而卿蔚以近弼相時盛儀
可無使藩恩命之加以示欽承祖訓之重尚體茲意勿
復有陳所辭宜不允仍斷來章

賜光祿大夫右丞相兼樞密使兼太子少師魯

國公史彌遠再上表辭免三局進書轉官恩
命不允仍斷來章批荅

省表具之卿以研測聖幾之學鋪張王度之文獨秉政
鈞兼持史筆叙列聖億萬斯年之世繫粲焉金枝玉葉
之輝裒中興三十六載之獻謨重於拱璧赤刀之寶舉
嘉泰開禧之行事倣李衢蘇冕以成書並詒悠久之傳
帥是總提之力夫制作國之大典朕不敢輕爵賞君之
大權朕不敢廢勉祇渙渥毋守謙辭所辭宜不允仍斷

來章

賜朝奉大夫試左諫議大夫兼侍讀鄭昭先辭
免除端明殿學士簽書樞密院事兼權參知
政事兼太子賓客恩命不允仍斷來章批答

省表具之朕求當世之彥相與建當世之功有大臣之
材莫如有大臣之度蓋心平乃可揆物非量博不能受
人故嘗即其議論之間因以觀其平昔之蘊卿性資蘇
裕德宇靚深探厥淵源一本聖門之正學望其容貌知

為天下之偉人自陟朝行徧居言責無偏無陂務持公道之衡不激不隨雅得爭臣之體僉諧既允圖任何疑繇七諫而擢機廷雖先朝之或有不六年而參國論蓋近比之所無其思思遇之隆益展謀猷之助茲為美報焉用謙辭所辭宜不允仍斷來章

賜正議大夫知樞密院事兼參知政事兼太子賓客雷孝友上表再辭免以皇太子講毛詩終篇轉一官恩命不允仍斷來章批答

省表具之朕聞六經皆聖人作而洙泗之間啟告學者
獨於詩尤詳焉蓋可興可羣之未究無以知事君父之
方周南召南之不為必有正牆面之慮夫學者猶爾况
於承祧貳極之重者虜今吾元子刻意是經優而柔之
德器日茂朝夕輔導師賓之力為多進秩眊功厥惟常
典卿其毋辭所辭宜不允仍斷來章

賜金紫光祿大夫右丞相兼樞密使兼太子少
師史彌遠上表再辭免進呈安奉高宗皇帝

中興經武要略了畢轉官恩命不允批答

省表具之朕惟周漢再造之君孰若宣光甚盛之烈然
詩人歌詠僅存赫赫業業之累章史氏形容不過赳赳
明明之數語未有萃三紀張皇之略為一編會粹之書
言其震疊則不測如雷霆窺其變化則無窮如天地俾
予小子獲監觀之益繫吾元臣專典領之功越進崇階
宣云濫受往祇茂渥毋或固辭所辭宜不允

賜金紫光祿大夫右丞相兼樞密使兼太子少

師史彌遠再上表辭免進呈安奉高宗皇帝
中興經武要略了畢轉官恩命不允仍斷來

章批答

省表具之人主之孝以揚祖烈為先國家之事以飭戎
昭為急比勒成於鉅典悉登載於明謨俾中興攘夷復
古之功垂於永久而今日經武整軍之畧有所据依於
朕豈小補哉非卿誰能辦此宜膺懋賞勿復終辭所辭
宜不允仍斷來章

賜正議大夫知樞密院事兼參知政事兼太子賓
客雷孝友上表再辭免進呈安奉高宗皇帝
中興經武要略了畢同提舉官特與轉兩官
依例加恩恩命不允仍斷來章批答

省表具之朕惟皇家復古之勲偉高廟平戎之略雖勉
遵時晦不欲黷武以病生靈而申做邊虞未始恃和而
忘守備迨至獫狁整居之暴迄收狒狸送死之功曷是
宏規布於方冊俾鑒觀而有補繇典領之得人豈以勤

勞而忘信賞與其偃僂再命堅卿辭寵之心孰若張皇六
師助予經武之烈所辭宜不允仍斷來章

生日詔

賜史丞相生日詔

勅彌遠東方曰春萃乃乾坤之瑞西平有子為吾社稷
之臣千齡符夢弼之占再世決和戎之議勲庸甚偉夷
夏具瞻揆初度於孟陬允協靈均之賦保眉壽於魯國
方廣鳧繹之詩重申臺餽之朐式侈門弧之慶

賜少傅吳環生日詔

勅吳環漢都馬鄧之賢首推耆德周嶽甫申之降屬在
茲辰方自適於燕頤宜永綏於壽嘏特伸頌式庸示眷
懷

賜參知政事樓鑰生日詔

勅樓鑰月臨冬仲天祐皇家當剝爛復反之時適陽盛
陰微之始生吾元老為國正人方參秉於事樞宜寵加
於賜式益綏壽嘏庸副民瞻

賜右丞相史彌遠生日詔

勅彌遠千載風雲之會式契休期四明仙聖之區實鍾
英氣屬此泰通之月生吾鼎輔之臣世秉機衡功施社
稷往致使蕃之錫用仰耆艾之祥

賜嗣秀王師揆生日詔

勅師揆乃睠賢王惟時耆哲清心寡欲味黃老之格言
迪德秉彝蹈間平之雅躅屬當初度爰錫多儀祝卿齡
背之年狀我犬牙之勢

賜右丞相史彌遠生日詔

勅彌遠帝賚說以正四方商邦嘉靖天生晟而為萬姓
唐室中興睠予社稷之宗臣時乃乾坤之英氣歌降神
於峻嶽方賡周雅之詩紀初度於孟陬更協楚騷之賦其
加蕃錫以介修齡

賜少傅吳瓌生日詔


勅吳瓌思齊大任仰徽音之如在不顯申伯偉耆德之
獨存屬此仲春時維初度其加異渥以介龐禧

獎諭詔

賜畢再遇蕩平淮寇顯有勞効獎諭詔

勅再遇比者淮楚之郊姦民嘯聚毒流縣鄙害及蒸黎
朕意其本心或出詿誤姑從招諭許以自新迺負固以
罔悛至弄兵而未已卿忠勇票銳為國爪牙布宣王靈
指授將略卒蕩平於羣醜以綏靖於一方捷奏踵聞威
聲大振緬惟盡瘁良極歡喜今氛祲既清式寬予顧瘡痍
未復尤惻我心卿其收輯散亡拊循凋瘵盡解犢牛之

帶佩亟安鴻鴈之哀鳴時乃之休惟朕以懌故茲獎諭
想宜知悉



西山文集卷二十二

欽定四庫全書

集部

西山文集卷二十三

四

詳校官庶吉士臣張溥

主事臣呂雲棟覆勘

總校官降調編修臣倉聖脉

校對官助教臣吳省蘭

謄錄監生臣許溶

欽定四庫全書

西山文集卷二十三

宋 真德秀 撰

翰林詞草

勅書

賜湖北安撫使充京西湖北制置使李大性銀

合夏藥勅書

勅大性朕遠處穆清軫懷炎赫矐言侍從之老方劇藩

垣之勞錫以珍良助其節適尚廣蠲痾之澤亟蘇苦熱之民

賜御前諸軍都統制李貴王大才莊松銀合夏

藥勅書

勅李貴等朕身居廣厦心念和門屬茲爍石之時嗟我擐金之士其放藥餌以滌馭煩

賜安南國王李龍翰歷日勅書

勅安南國王李龍翰朕稽堯典之授時裁成歷紀倣周

人之頒朔遠暨藩方眷乃忠純為予屏翰念將更於華
歲其預錫於新書欽奉國章益修侯度

賜江淮制置使黃度冬藥勅書

勅黃度卿以鮎背之年任麟符之寄勞於王事念在朕
心屬當嚴沍之辰慮爽寢興之節宜須名劑以輔冲和
賜都統制王喜馬軍都虞候許俊都統制劉元

鼎李貴王大才莊松何汝霖副都統制呂春
李好古盧彥張威石宗水軍統制馮榭銀合

夏藥勅書

勅王喜等朕推夏王扇暍之心陋唐室生涼之賦其於
兆姓尚欲被之清風矧我將臣可不念其瘴暑賜爾西
山之劑彰予南面之仁

弔安南國王勅書

勅安南國王嗣子李昊昂維乃先王世守藩服恭勤匪
懈貢獻以時三紀於今始終一德奄茲訃告良惻予懷
卿嗣事云初銜哀罔極尚其節抑式逌寵光

賜安南國王嗣子李昊昂嘉定七年歷日勅書

勅朕在舜璣衡謹乃授時之政布周正朔暨於出日之邦
式睠藩方夙陶皇化將舊封之載襲宜新歷之首頒往服
寵光益虔屏衛

大禮冊文

郊祀大禮前二日朝獻景靈宮聖祖天尊大帝

冊文

伏以皇矣有宋受命溥將仙源肇開自我道祖發祥儲慶

敷遺後人粵惟眇冲獲典邦祀迎日之至將見於郊德馨未聞奚自昭假聖靈如在尚克相之俾臻厥成以介景福

郊祀大禮前一日朝獻太廟祖宗帝后冊文

伏以惟我祖宗克堪用德延鴻寶命以畀後人顧慚菲涼懼弗勝任將以亞歲有事於郊率循舊章先饗宗廟於赫列聖威靈在天尚其相之俾迄熙事膺受多福垂休無疆

圓壇祭饗昊天上帝冊文

伏以皇皇后帝照臨萬方厥棐惟忱厥輔惟德臣以寡

昧獲承宗祧賴天降康中外底定報本之義其敢弗虔翼
翼小心躬修元祀匪曰祈福私於眇躬惟民之安斯國之
慶

圓壇祭饗皇地祇冊文

伏以至哉坤元與天同大是生百物以育兆民比年以來
農扈告稔媪神錫羨寢濟登茲願惟菲涼其曷以報敬迺
彝典合祛於郊兢兢一心庶克昭事尚祈純佑以固邦基
圓壇祭饗太祖配饗冊文

伏以昔在周室禋祀是嚴誰其配之皇祖后稷維我藝祖
肇造邦家功大德崇有光於古肆惟冲眇嗣守慶基創業
之艱敢忘厥自茲率舊典升侑於郊威靈赫然尚克顧饗

圓壇祭饗太宗配饗冊文

伏以煌煌寶命太祖受之赫赫慶圖太宗成之二后在天
如周文武眇末小子獲承丕基推迹本元其敢不恪屬茲
親祀並侑是崇尚其顧歆克昌厥後

青詞祝文

祈晴設醮青詞

伏以事天事地夙罄精忱時雨時暘未臻休應念茲蠶月
重以麥秋詎意浹旬之間偶遭霖滂之變三盆將獻恐妨
就簇之工五穀最先懼失食新之望况連歲旱荒之相踵
而四方愁歎之未紓重罹此災一至斯極皇矣上帝本溥
博以好生今此下民將困窮而阡死願回慈愍亟掃陰靈
庶寬寒餒之憂少追菲涼之責無任懇禱之至

太陽交蝕奏告祝文

清臺占象陽曜有虧惟德不明天降厥咎惕然祇懼不敢
康寧神其相之亟復常度

祭謝祝文

太史有言陽曜當虧陰雲蔽之象弗下著上虞四方或睹
茲異不忘祇懼冀格神休

求晴設醮青詞

稽事方興咸切豐年之願梅霖不已復罹積潦之災慨念
平疇卷為巨浸沾體塗足二時殫種蒔之功疾首痛心一旦

墮渺茫之境惟德弗類上干至和彼民何辜使就死地願
收陰沴亟煥陽明庶幾高印之獲全尚或有無之相補於
神特噓吸之易而民免溝壑之憂漑懇投誠鞠躬請命

祈晴祝文

天地宗廟
社稷等

旱蝗連歲民力已殫霖潦彌旬田功將廢顧眇躬之不德
嗟有衆之何辜亟控精忱願祈休應掃除陰沴煥赫陽明
庶寬暑雨之吝迄底豐年之慶

又

首夏以來常陰為沴昔既妨於蠶麥今復害於桑盛載循
菲涼尤重兢惕冀蒼穹之垂憫俾白日之顯行免貽穡事
之憂少慰農人之望

祈晴感應報謝祝文

天地宗廟
社稷等

比以積陰干陽淫雨為沴田疇告病閭巷興嗟祇露丹衷
懇祈鴻覆大明有赫宿潦頓收仰繫善應之仁獲濟倒垂
之急敬伸報謝庸表精忱終祈大造之曲成庶或豐年之
有望

宗廟祝文

同前詞內仰繫善應之仁獲濟倒
垂之急改作聖靈在天休應如響

報恩天慶觀青詞

伏以霖澍為災窵盛告病亟攄丹悃虔扣蒼穹曦馭上
騰陰霾盡掃少慰羣元之望仰繫大造之仁用控精誠
少伸報謝尚終祈於覆育庶迄底於登成

茅山崇禧觀啟建瑞慶聖節道場設醮青詞

伏以保佑自天方洪圖之丕衍誕彌厥月屬初度之載
臨瞻句曲之名山崇列真之邃宇肅陳菲薦祇按靈文

伏願精意默孚颺游來格歛時五福敢專私於眇躬綏厥兆民冀同躋於壽域

滿散朱表

伏以十月為良屬臨載育九天雖遠不越棊忱用憑金籙之秘文仰扣玉虛之真境所期寰宇皆為堯舜之民敢曰眇躬獨冀僑松之壽

太陽交蝕祭告祝文

伏以季冬之吉日有食之顧惟不德致此大異側食祇

懼靡敢康寧神其相之迄復常度尚饗

祭謝祝文

伏以以人占天曰日當食陰雲布濩景曜靡虧尚虞四方或睹茲變側躬祇栗冀格神休尚饗

茅山崇禧觀啟建瑞慶聖節道場設醮青詞

伏以載震載夙聿臨彌月之期來下來崇冀獲上天之祐緬惟福壤近在陪都肆命羽流就嚴寶供恭願精忱孚達景貺遄臻偃伯靈臺包五兵而不試卜年郊廓綿

萬世以無疆

滿散朱表

伏以寶鑑絲囊紀佳辰於誕序瓊章藻笈敷妙韻於殊
庭既勝會之崇成諒靈釐之畢集歛時五福豈涼菲之
敢專延及羣生冀洪纖之名遂

太一宮中乞撰星辰不順保國安民內中後殿
設醮青詞

伏以皇風丕洽五星連珠緯之光帝治質隆七政順璿

璣之度苟踐履有毫釐之媿斯災祥甚影響之隨臣猥以眇躬早膺休命雖陟降不忘於對越而精神或昧於感通比覽日官之言屢陳乾象之異火行壘壁歲犯明堂顧譴告之相仍皆非涼之所召夙宵自警震懼靡遑是用涓日陳儀洗心歸命冀鑒臨之赫赫消禍變於冥冥宋有善言星期必退齊無穢德彗或可禳庶憑悔艾之誠亟底和平之福

修整攢宮殿宇圍牆補種窠木奏告昭慈聖獻

皇后等處表文

伏念東望禹會春雲藹然顧瞻山陵潛焉出涕松楨是植棟宇是修用嚴孝思敢不昭告

恭淑皇后祝文

伏以慨望寢園追懷后德以時種植併飭繕修諏日既良不可不告

郊祀大禮禮畢奏謝昊天玉皇上帝聖祖天尊

大帝元天大聖后表詞

伏以候氣黃鍾展誠紫時顧惟涼德深虞昭格之難幸
迄盛儀獲覩熙成之慶仰惟大造實鑒匪表敬演冲科
用伸虔謝

奏謝諸帝后表詞

伏以穆卜新陽恪修元祀既迄燎薰之禮遂敷曠蕩之
恩幸賴鴻休獲成熙事稽彝章而昭告冀靈鑒之具孚

郊祀大禮禮畢祭謝南獄東海南海南瀆祝文
迺者日南至親祀於郊兢兢焉懼弗克任歲事之夕神

光煥然嘉應響答維喬嶽之靈實陰相之俾臻有成其
曷敢忘報

南鎮會稽山祝文

維南有山實曰會稽巨屏屹然為國之鎮屬茲親祀密
藉靈休迄臻厥成其敢忘報

攢宮修換殿宇補種窠木奏告昭慈聖獻皇后
等處表文

伏以鼎湖弓劍莫留龍去之蹤禹會山川猶記象耕之

迹屬臨春序追愴仙游加葺棟楹增培松檟式寓孝思
之篤用伸昭告之虔

恭淑皇后祝文

伏以陽春將半朝露既濡緬瞻禹會之名山追愴長孫
之賢佐增修園寢用妥神靈

內中後殿設醮祈禱豐稔歲康保國安民青詞
伏以天作之君實司民物之命政失於下斯監陰陽之
和迺者春夏以來雨暘弗節行都地震駭變異之非常

近旬水災痛生靈之何辜靜言咎證實做眇躬既克已
以勵省修之誠且多方以行寬卹之令庶盡弭災之實
嘿回眷命之祥更演冲科冀垂景貺五風十雨長銷乾
溢之虞四海九州共洽豐穰之樂控忱以禱得請是期
無任虔禱之至

建康府茅山崇禧觀啓建瑞慶節道場設醮青

詞

伏以五百年王者之興自慙匪德三十六洞天之勝無

越茲山就巖醮筵肅迎仙馭庶精誠之易徹致景貺之
端臻敢冀眇躬獨超廣成子之壽願陶華胥氏之風

朱表

伏以誕序載臨醮儀告備敢攄忱願游叩高靈風雨和
時屢獲茨梁之慶江淮清晏永無烽燧之驚

進呈中興經武要略安奉青詞

伏以於惟高皇再造我宋赫赫業業媿宣王立武之規
赳赳明明邁世祖沈幾之略久編摩於宥府將登奉於

寶儲載考舊章宜伸昭告

中殿祝文

伏以炎正中微寓內靡沸維我高廟紹開中興雄斷廟
謨具在方冊肆嚴纂錄以示後人將登寶儲是用昭告

建康府茅山崇禧觀啓建瑞慶聖節設醮青詞

伏以初度載臨敢詫虹流之瑞名山在望夙標鶴集之
祥即金堂玉室之勝區按藥笈瓊章之秘錄庶幾丹悃
獲徹蒼文願俾黎元重見燧人之治豈云匪質獨齊少

廣之年

朱表

伏以念言良月實屆誕辰爰即金峯載陳寶醮願與元
元之衆同饗昇平敢云眇眇之躬獨私眉壽

帖子詞

端午帖子詞

皇帝閣六首

五言

庚午仍重午離明正繼明炎圖千萬歲從此愈光亨

又

玉帛交鄰後清陰滿塞榆苞桑存至戒猶佩辟兵符

又

有意甦民瘼無心玩物華祗求三歲艾休進五時花

七言

當宁求賢軫慮長每因佳節憶沉湘不須五色紉成線
自有忠言補舜裳

又

延英晝永汗霑衣正是君王訪問時
應笑開元恣驕樂粉團爭射學兒嬉

又

聖心日日望豐年清曉鑪熏徹九天
二麥登場蠶著繭平疇新綠又連阡

皇后閣五首

五言

仙木浮瓊醴香菰簇寶槃漢宮三十六爭奉聖人歡

又

槐影綠成圍腰舉繭館歸我躬惟服澣先職袞龍衣

七言

披香殿裏繡筵開九節菖蒲七寶杯應念臣勞如卷耳
欲將厚意酌金罍

又

愛民一念徹淵泉內府時時出禁錢只此自添無量壽

何須彩索頌長年

又

珠箔輕明暑氣微
靜披圖史監前徽
堪嗤唐室耽遊燕
漫借裙襦作妓衣

皇太子宮五首

五言

彩索金為縷
香杭玉作團
從今逢午節
歲歲奉親歡

又

銀榜青宮裏天風五月秋應憐耦耕者曝背向農疇

七言 三首

午漏遲遲滴玉壺清陰翳翳布庭除只將底事銷長日

大學中庸兩卷書

東宮雅好大學中庸常命制潛黃顯謨書之

又

居仁堂上薰風滿間把騷章子細看令節豈徒供黍棟

巧言端欲戒椒蘭

又

焜煌八字彩毫書鐵畫銀鈎炤坐隅心正自能祛百厲

辟邪安用道家符

東宮嘗大書八字曰格物致知正心誠意分榜於藏書之室詹事戴大蓮

嘗以語館閣同舍故此詞及之焉

春帖子詞

皇后閣五首

五言

寶扇彩雲開宮粧襯玉梅共持千載柏爭獻萬年杯

又

寶字泥金帖工夫剪刻新四時俱百順可但慶宜春

七言

曉來寬大詔初頒物物咸霑雨露恩共仰生成歸帝力
誰知輔佐屬坤元

又

笙歌北院連南院景物新年勝舊年梅柳也知天意好
十分粧點鬪春妍

又

御沼春融冰半漸偶觀流符已參差因時有感闕睢詠
寤寐難忘窈窕思

端午帖子詞

皇后閣五首

五言

翠浪兩岐麥冰絲入繭蠶今年收倍好歌頌滿周南

又

日永坤寧殿時將萬卷看從容聊灑翰寶扇舞龍鸞

七言

紅榴紫槿映池臺
玳席還當水殿開
借問天顏何大喜
皇儲親奉萬年杯

又

水晶簾捲午風輕
萬壑清寒凌室冰
閒奏薰絃思解愠
恐教人世獨炎蒸

又

繞過端辰又誕辰
天家風物鎮長新
六宮兢獻長生縷

一縷應期一萬春

春帖子

皇帝閣六首

五言

嘉定無疆歷纔開第五春
金穰端有兆太歲恰居申

又

新歲朝元使龍荒萬里來
至仁天廣大朔漠亦春臺

又

雉扇開金殿雲韶奏紫庭天顏知有喜班首是前星

七言

萬宇新歌大有年又看瑞雪粲瓊田太平和氣隨春轉
斗米從今三四錢

又

東風昨夜入簾帷便覺深宮漏影遲一曲涼州花盡放
不須先作報春詩

又

陽進陰消屬此時凝旒南面盍深思微臣自愧無規諫
願獻先朝學士詩

皇后閣五首

五言

寶勝千春字瓊樽九醞香六宮齊上壽地久配天長

又

金屋春容早銅樓曉色分奉觴天一笑聖子似周文

七言

柳眼窺春暖欲眠梅粧點雪鬪新妍一年好處如今是
遠勝清明寒食天

又

誰贊東皇轉化鈞宮中堯舜亦深仁祇將一點陽和意
散作乾坤浩蕩春

又

煙花萬匝繞坤寧獨把牙籤手不停為要八荒皆壽域
彩毫親跋度人經

東宮五首

五言

薄薄觚稜雪融融
甲觀風晴光挾和氣
先到少陽宮

又

燈市千門月花時
萬井春朝來資善議
猶自問窮民

七言

畫堂金榜揭居仁
萬物知闕念慮深
一點陽和從震出
助成天地發生心

又

鶴駕通宵入問安
龍墀清晚押朝班
天顏喜見重輪月
春色先回萬歲山

又

濟濟儒冠萃講庭
韋編竟日共研精
還將泰象參人事
要使羣陽更彙征

皇后閣五首

五言 二首

夢月佳辰近端陽令節新何須纏綵縷金母自千春

又

艾虎垂朱戶槐龍舞玉墀晝長無一事祇誦二南詩

七言

三盆蘭已綠冰縷五色絲新織海鮫不但綵繒華節物
要成龍兗待親郊

又

曉來金殿沐蘭湯因感騷人興寄長重勸君王勤采善

由來香草比忠良

又

元武門前羅百戲
昆明池上鬪千艘
聖人不事遊觀樂
翻笑前朝侈燕敖

嘉定六年春帖子詞

皇后閣五首

五言

聖德天同大熙然
萬物春誰知
坤載厚發育
輔深仁

又

內殿稱觴早仙班擁翠翹
春來多樂事人日是明朝

七言

翠輦迴從五福宮管絃聲裏萬花紅
熙熙和氣皇州滿都在乾坤橐籥中

又

玉梭織就充龍衣已奉君王泰時祠
準擬腰輦臨繭館清明前後浴蠶時

又

一夜東風到集芳滿園紅紫已低昂尋花問柳非吾事
燕坐坤寧春晝長

皇后閣五首

五言

玉佩響瓊樓天風五月秋人間正炎熱猶軫聖情憂

又

讀罷懷沙賦重哦卷耳篇慙懃勸明主屬意在求賢

七言

記得當年夢月符
浴蘭節後恰旬餘
欲知天錫無疆壽
認取仙螭頷下書

又

貝葉新傳寶藏經
聖心端為福羣生
從今物自無疵癘
安用桐君紀藥名

又

瑤池十丈藕花香
清賞尤便水殿涼
聞說內家多樂事

前星親自捧霞觴

致語口號

金國賀正旦使人到闕紫宸殿宴致語口號句

合曲詞

致語

臣聞月正元日舜門廣闢於四方春王三朝漢殿畢來
於萬國恭惟皇帝陛下繼天御極法古陳儀警蹕而下
東廂衣裳而正南面賓臚並設肅大廷鷓鴣之班僭侏

具陳小異域魚龍之戲臣等忝居法部敢獻民謠

口號

榆關玉塞靜無塵嘉定如今第四春
兩國交馳通好使八荒同作太平人
翠鼉鼓奏娛嘉客白獸樽浮賞諫臣
聖歷從茲天共遠年年玉帛會楓宸

句合曲

雲上天需皇歡浹而羣臣醉雷出地豫樂音調而四時
和上悅天顏教坊合曲

金國賀正旦使人到闕紫宸殿宴致語口號勾

合曲詞

致語

臣聞東風入律回萬宇之陽春南面垂裳受四方之賓
貢恭惟皇帝陛下天容睟穆聖德昭清當乾坤交泰之
辰作君臣相悅之樂舉觴太極殿未誇唐室之元正置
酒長樂宮更陋漢朝之十月臣等謬參法部輒獻衢謠

口號

六龍扶輦下雲間紫殿風微響佩環朔漠遠馳鄰國信
前星親押外朝班九賓重譯瞻宸極萬歲三聲繞壽山
大史預占年大有更添喜色上天顏

勾合曲

法酒三行方祝聖人之壽鈞天萬舞宜揚治世之音上
奉宸歡教坊合曲

瑞慶節集英殿宴致語口號勾合曲詞

致語

臣聞千歲河清適紀千秋之節萬官星拱同稱萬壽之
觴恭惟皇帝陛下德配乾坤澤流雨露光照綺蘭殿上
未夸漢室之開祥春生花萼樓前竊小唐家之張燕

口號

皇家卜世過周唐天啓真人應運翔抱日預占恭如夢
飛龍曾報皖山祥翠雲影外來金母紅霧香中擁玉皇
樂府賤工無以祝願將金鑑代珠囊

勾合曲

虎拜萬年既祝聖人之壽鳳儀九奏宜揚治世之音上
悅宸顏教坊合曲

金國報登位使人到闕集英殿宴致語口號勾
合曲詞

致語

臣聞合兩國之成瑞節遠馳於星傳設九賓之禮宴觴
載舉於天庭伏惟皇帝陛下大德難名至仁無外弓載
橐戈載戢常存安天下之心酒如澠肉如京特厚遇使

臣之意歡聲至地和氣回春臣等服在伶工敢陳口號

口號

時平朝野寂無譁南北歡盟共一家不遣纖塵驚塞上
要將和氣匝天涯星馳琛幣來鄰境雲擁衣冠會正衙
聖澤汪洋天廣大侍臣何惜醉流霞

勾合曲

君子之酒旨且多方初筵之有秩治世之音安以樂宜
雅奏之載揚上悅天顏教坊合曲

西山文集卷二十三